

DIDZA' BSÖLĚ'Ě PABLO QUEĚ' FILEMÓN

Pablo rugapĕ' Dios Filemón

¹Neda', Pablo, dzagbi' neda' bi'i bóchi'ru' Timoteo, ati' nadzuna' lidx guia le runa' xchinĕ' Jesucristo, rugapa' Dios li', Filemón, nacu' bönni' nadxi'itu' len runu' xchinĕ' Cristo ca runtu' netu'. ²Rugapa' Dios Apia, ngul quiu', nacnu zanru' réjlĕ'nu Cristo. Rugapa' Dios ca' zxi'nu', Arquipo, nacbi' queĕ' Jesucristo ca bönni' rijĕ' gdil-l, runbi' xchinĕ' Lĕ' ca runtu' netu'. Lĕzca' rugapa' Dios bunách queĕ' Cristo tu'dubĕ' lu yu'u lidxu'. ³Rnaba' lahuĕ' Xuzru' Dios lenca' lahuĕ' Xanru' Jesucristo, uzá' ladxĕ'ĕ queĕli' len gunĕ' ga soa dxi icj ládxi'dau'li'.

Ca runĕ' Filemón le rejlĕ'ĕ Cristo

⁴Xclenu', rétezca'-nĕ' Dios queĕru', len rajnéyteczda' li' cati' rulidza'-nĕ' Dios. ⁵Cni runa' le rdxin quia' didza' ca nadxi'inu'-nĕ' Xanru' Jesús len réjlĕ'u Lĕ', len nadxi'inu' ca' yúgu'tĕ bunách chnubijĕ' quizi queĕ'. ⁶Rnaba' lahuĕ' Dios gunĕ' ga guntzca dxin lban runu' ca nac le réjlĕ'u Cristo, quiĕ luzí' xbey nup nacué' ni' yúgu'tĕ le nac dxi'a, le

ruzá' ladxĕ'ĕ queĕru' Jesucristo.

⁷Rudzijda' len ruzí' zxóna' le nadxi'icnu'-nĕ' bóchi'ru', len benu' li', böcha'a, ga guluhuóac ládxi'gac bunách ta'yejlĕ' Cristo.

Ral-la' unít lahuĕ'-bi' Filemón Onésimo, bi'i nada'u queĕ'

⁸Qui lĕ ni na', zal-la' dĕ lu na'a le naca' gbaz nasölĕĕ Cristo gna bé'ida' li' ca ral-la' gunu' ⁹ni ráta'yua' lau' len yöl-la' nadxí'i, neda' ni chnaca' bönni' gul len yu'a lidx guia le runa' xchinĕ' Jesucristo. ¹⁰Ráta'yua' lau' uláz queĕbi' Onésimo, bi'i na' bena' ga böacbi' queĕ' Cristo, len qui lĕ ni na' nacbi' ca zxi'ncza' ga ni nadzuna' lidx guia.

¹¹Bi'i ni, zi'al cutu gucbi' lsaca' quiu', san na'a nacbi' lsaca' quiu' li' lenca' quia' neda'. ¹²Bi'i ni rusöla'a-bi' ga zu'. Na'a, ben ba la'n lĕbi' ca néda'cza' runu' ba la'n, le nadxi'ida'-bi'. ¹³Gu'nda' ugá'nlenbi' neda' ni, quiĕ uláz quiu' gunbi' xchina' tsal ni yu'a lidx guia le runa' lban qui didza' dxi'a ¹⁴san cutu bi rĕ'nda' guna' le cutu nac didza' quiu', cui guna' bayúdx gáclenu' neda', san huac gáclenu' neda' le

rè'ncznu' ca'. ¹⁵Nazx ca' qui lè ni na' buza'bi' ga zu' Onésimo tu chi'idau' quiè udxinbi' tsaz ga zu'. ¹⁶Na'a, cutur gacbi' quiu' ca bi'i nada'u, san gacbi' quiu' ca bi'i bóchi'czu', nacbi' bi'i bóchi'ru' réjlè'bi' Cristo, len nadxi'iru'-bi'. Nacbi' cni quia' neda', ati' ral-la' gacrbí' ca' cni quiu', clègz ca bóchi' lza'u, san lèzca' ca bi'i bóchu'u réjlè'bi' Xanru' Jesucristo.

¹⁷Qui lè ni na', chqui' nunu' neda' tuz, ben ba la'n lèbi' ca néda'cza' runu' ba la'n. ¹⁸Chqui' bi zxguia' benbi' quiu' o chqui' bi rál-la'bi' quiu', gnatèz neda' ral-la'a. ¹⁹Neda', Pablo, len na'cza' ruzuja' quiu' lu guich lè ni: Néda'cza' quixja' bi rál-la'bi', len clèg gyèpa' li': Lèzca' ral-lu'u quia' yúgu'tè le dè quiu' le bena' neda' ga napu' yól-la' na'bán gdu. ²⁰Ca' gac, bócha'a. Chqui' dè le uzi'a xbau' le náquiru' queè' Xanru', ben lè na' chgúta'yua' lau'

le naca' bóchu'u réjlè'a Cristo, ati' cni gunu' ga huöac ladxa'a.

²¹Ruzuja' quiu' lu guich ni, le ruzxöni ladxa'a li', gunu' ca rna xtidza'a, len nözda' gunu' yelati' ca lè na' chgúta'yua' lau'. ²²Lèzca' rnaba' lau' upa'u quia' ga soa' lu yu'u lidxu', le runa' löz uruja' lidx guia ni, ati' guida' ga zoali' le rulidzli'-nè' Dios rnabli' neda' lahuè'.

**Pablo ruzujè' lu guich le
rugáp Dios Filemón**

²³Rugapè' Dios li' Epafras, yú'ulenè' neda' tsaxxón lidx guia ni le runè' xchinè' Jesucristo.

²⁴Lèzca' tu'gapè' Dios li' Marcos len Aristarco, len Demas len Lucas, bönni' ni túnlenè' neda' tsaxxón dxin queè' Cristo.

²⁵Rnaba' lahuè' Xanru' Jesucristo uzá' ladxè'è queèli'. Ca' gac.